



Inatsisartunut ilaasortaq Anders Olsen, Siumut

**Kangerlussuup Sisimiullu akornanni aqqusinniornissaq pillugu suliniummut tunngatillugu § 37 naapertorlugu apeqqutip nr. 2020-146-p akineqarnera**

Allakkap ullua: 09-09-2020  
Suliap nr 2020-15739  
All. id 14804602

Asasara Anders Olsen

P O Box 1037

3900 Nuuk

Oqa. (+299) 34 50 00

Allakkasuaat (+299) 34 63 50

E-mail: oed@nanoq.gl

www.naalakkersuisut.gl

Inatsisartut Suleriaasianni § 37 naapertorlugu aqqusinernut aningaasaliinissamut tunngatillugu Naalakkersuisunut apeqquteqarsimavutit.

Apeqqutigisatit uannit akisassanngortinneqarsimapput. Apeqqutigineqartut tullinguuttuni ataasiakkaarlugit uteqqinneqarput akiortorneqarlutillu.

**1. Kangerlussuup Sisimiullu akornanni aqqusinniassamut tunngatillugu, inuiaqatigiinnut aningaasaqarniarnikkullu sunniutigisinnaasaannut avataaniit siunnersortimut isumaqatigiissuteqarnissaq qanoq isilluni taamak siviutigisinnaava?**

Akissut: Apeqqutigineqartumi Kangerlussuup Sisimiullu akornanni aqqusinniortoqarnissaa pillugu aalajangiisoqareersimasoq. Taamaattoqanngilarli, aqqusinermik taamaattumik sanaartortoqarnissaa ilumut inuiaqatigiit aningaasaqarnerat tunngavigalugu tulluurtuunersoq misissuiffigineqassasoq Inatsisartut aalajangiiffigisimavaat, tassunga ilanngullugu aqquserngiornikkut aningaasartuutaasussat pilersaarusernerat. 2020-mut Aningaasanut Inatsimmi tassunga 5 mio. kr.-nit immikkoortinneqarput. Taamatut aningaasaliissuteqarnermi koruunimiit koruunimut naapertuuttoqarnissaa piumasariineqarsimavoq.

Coronamik ajornartorsiorneq aningaasartuutissallu siumut naatsorsorneqarsinnaanngitsut kalaallinut inuiaqatigiinnut kinguneqarsimasut pissutaallutik maajimi ilassutitut aningaasaliissutit akuersissutigineqarput, taakkulu aqqutigalugit missingersuutit Coronamik ajornartorsiornerup akiorniarnissaanut suliniutinil arlalinneersut allanut nuuttariaqarsimapput; taakkununngalu Kangerlussuup Sisimiullu akornanni aqqusinngortussap pilersaarusiornissaanut akissarsianullu misissuiniissamut 5 mio. kr.-nit (IA20-880) ilaapput.

Avatangiisinik sunniutinut nalilersuineq ilimagisamiit sukkanerumik akuerineqarsimammat aningaasat tunniuteqqinneqarput (IA20-891). Taamaammallu piffissaq sivikinnerusoq pilerpoq, tassanilu siunnersortinut avataaneersunut isumaqatigiissutip aningaasalersornissaanut inatsisitigut tunngavissaqarsimangilaq. Taamaattoqarmallu piffissani tassani atsiortoqarsinnaasimangilaq.

Tamatuma saniatigut ajornartorsiornerup nalaani suliassat allat Coronamut tunngassutillit Naalakkersuisoqarfinit pingaarnertinneqassasut qitiusumiit aalajangerneq nalunaarutigineqarsimasoq. Naggasiullugulu malugeqquneqarpoq

suliassap siunnersortillu piukkunnaatillit avataaneersullu akornanni eqqortumik naapertuuttoqarnissaata misissuiffiginissaa piffissamik atuinartuummat.

**2. Avataaniit siunnersortitut Oxford Univesitet-imi Oxford Global Projects, isumaqatigiissuteqarfineqangajalersoq, Naalakkersuisunit qanga attavigineqarpa?**

Akissut: Allakkatigut attaveqarneq siulleg ullormi 27. april 2020 atsiorneqarpoq. Tamanna sioqqullugu oqarasuaatitigut attaveqarniarneq arlaleriarlugu misilinneqartarsimavoq.

**3. Avataaniit siunnersortimut suli isumaqatigiissuisortoqarsimanginnera imatut paasineqassanerluni, aqqusinissap pilersaarusiornissaa Naalakkersuisunit pingaartinneqanngitsoq?**

Akissut: Naamik. Suli isumaqatigiissuisortoqarsimanginneranut aningaasaliissutit akuersissutigineqartut Naalakkersuisunit malinneqarnissaat, kiisalu suliap sularineqarnerata pitsaasuunissaa, pingaartumik siunnersortinik piukkunnarnerpaanik isumaqatigiissusiornissamut tunngatillugu, taamaaliornikkut aqquserniornissaq pillugu aalajangiinissap sapinngisamik pitsaanerpaamik tunngaveqarluni pinissaa tunngavissaqartinniarlugu.

Oxford Global Projectsip peqataalersinneratigut aqquserniornissamut suleqatigisassaq misilittagalik, nikananngitsoq nunanilu tamalaani ataqqisaasoq aqqutigalugu akissarsianik misissuititsineq qulakkeerneqarsimasoq Naalakkersuisut isumaqarput.

Neriuppunga siuliani akissutigisanni apeqqutitit akineqarsimassasut.

Inussiarnersumik inuulluaqqusillunga

  
Vittus Qujaukitsoq